

مسارات
خيرية CHARITABLE
PATHS

Tirsiga (32) Apr 2024



FARXAD BULSHADA WADA GAADHA

ARC OO TOBANNAAN KUN OO QOYS
GAADHSIINAYSA ODXADA IYO DHARKA CIIDDA





FARXAD BULSHADA WADA GAADHA

Gobalka Geeska Afrika waxaa ka jira dhibaatooyin nololeed oo dhinac kasta ah, waxaa ka mid ah cunto yaraan ay tiro koobyadii u dambeeyey ee Qaramada Midoobey qooyaasayaan in ay saamaysay dad ka badan 4.3.

Xilligan oo ay soo dhowdahay Ciidda weyn ee Al-Adxa ayaa hay'adda Gargaarka Afrika (ARC), iyada oo kaashanaysa hay'ado kale, shakhsiyaad samalayaal ah iyo dhinacyo kala duwan oo ah deeq bixiyeyaal gobalka iyo caalamkaba ka socda, waxa ay ku dhawaaqday bilowga ololaha qaybinta hilibaha Odxada ee sannadka 2024 (Ku beegan 1445 Hijriya). Si ay farxadda maalintaasi u noqoto mid bulshada wada gaadha, intii suurtagal ahna loo yareeyo bulshada ay cunto la'aantu ka kala dhantaali karto, damaashaadka maalintan weyn.

Mashruuca qaybinta hilibka Odxada waa fursad lagu dhiirrigeliyo in bulshada ladani ay ka qaybgasho hawlaha samafalka, isla markaana lagu xoojinayo qiyamka iskaashiga iyo iskaalmaynta ee bulshada dhexdeeda.

Dr. Cabdiraxmaan Mucallimi, maamulaha guud ee hay'adda Gargaarka Afrika oo faahfaahin ka bixinayey ololahan, waxa uu sheegay in yoolku uu yahay in la gaadho in ka badan 100 kun oo qoys oo sabool ama barakacayaal ah.

Waxa uu maamuluhu sheegay in mashruuca oxdada uu ku lammaanyahay mashruuc lagu magacaabo 'Ciidsii ubadka' oo dharka Ciideed la siinayo carruurta agoonta ah ama ka soo jeeda qoysaska ay hayntoodu yartahay.

Mashruuca Odxadu muhiimad gaar ah ayaa uu u leeyahay hay'adda ARC, maadaama oo uu ka mid yahay mashaariicda ugu waaweyn ee ay hay'addu sannad kasta fuliso. Maamulaha guud ee ARC oo faahfaahin ka bixinayey ayaa sheegay in himilada hay'addu ay tahay in la sii ballaadhiyo mashruucan si loo gaadho tirada ugu badan ee suurtagalka ah ee qoysaska danyarta ah ama dhibaatooyinka kale ee nololeed ay ku dhaceen, sida barakacayaasha. Gaar ahaan xilligan oo gobalka Geeska Afrika ay ka jiraan durufo adag oo dhaqaale.

“Waxa aan ugu baaqayaa hay'adaha samafalka, ganacsatada iyo shakhsiyaadka samafalayaasha ahba, in ay ka qaybgalaan kaalmaynta mashruucan hilibka Odxada iyo dharka Ciidda lagu gaadhsiiinayo bulshada saboolka ah” ayaa ka mid ahayd hadalka mudane Dr. Mucallimi. Isaga oo baaqiisaa ku ladhay codsi uu dadka ladan iyo guud ahaanba deeqbixiyeyaasha kaga dalbanayo in ay u dhego nuglaadaan gacan ka geysashada kaalmada lagula tacaalayo baahiyaha bani'aadamnimo ee Geeska Afrika ka jira.

SICIRKA UDXIYADA



Lax

Faa'idayste	Qoysaska Ka faaiday	Kg	Sicirka \$
24	4	22-18	80



Adhi

Faa'idayste	Qoysaska Ka faaiday	Kg	Sicirka \$
24	4	20-18	80



Geel

Faa'idayste	Qoysaska Ka faaiday	Kg	Sicirka \$
210	35	180 220	640



Sac

Faa'idayste	Qoysaska Ka faaiday	Kg	Sicirka \$
150	25	150 200	480





06



MASHAARIICDA
DHISMAHA



07



MASHAARIICDA
BIYAHA IYO
FAYADHOWRKA



08



AQOON & OGAAL



10



MASHAARIICDA
ARRIMAHA BULSHADA



Address: Barbera Road - Hargeisa
Mobile: +252633278256
Phone: +252514333
E-Mail:
Website: www.arcsom.org

مسارات
خيرية CHARITABLE
PATHS

WAA DHANBAAL BILLE AH OO
HAYADDA GARGAARKA AFRICA
(A.R.C) AY KAGA WARRANTO
MASHAARIICDEEDA HORUMARINEED
IYO BANI-AADAMNIMO .

TIRSIGA (32) APRIL 2024





MAAMULAHA GUUD OO KORMEERAY MASHAARIICDA AY ARC KA WADDO



Maamulaha guud ee hay'adda Gargaarka Afrika (ARC) ayaa u kuurgalay habsami u socodka shaqo ee xarunta ARC Muqdisho, iyo mashaariicda ay hay'addu ka waddo magaaladaas.

Dr. Cabdiraxmaan Mucallimi oo booqasho shaqo ku tegey caasimadda Soomaaliya, waxa kale oo uu fursaddan uga faa'idaystay xoojinta iskaashiga iyo wada shaqaynta ARC iyo hay'adaha iyo dhinacyada kala duwan ee ay shaqo wadaagta yihiin.

Waxaa booqashada ku wehelinayey mudane Muxamed Cabdalwahaab, madaxa Barnaamijka waxbarashada ee ARC, waxa aanay qayb ka tahay hawlaha joogtada ah ee maamulaha iyo madaxda kale ee Barnaamijyada iyo mashaariicda ay ku tagaan xafiisyada, iyo goobaha shaqo ee ay ARC mashaariicda ka waddo, guud ahaan dhulka Soomaalida ee gobalka



Geeska Afrika.

Waftiga maamulaha waxaa magaalada Muqdisho ku soo dhoweeyey, Dr. Maxamed Cali Geelle, maamulaha xafiiska ARC ee Muqdisho, waxa aanu warbixin waafi ah ka siiyey hawlaha shaqo ee socda, qorshayaasha hawleed ee xafiiska u dejisan, caqabadaha jira, fursadaha ay tahay in laga faa'iideeyo ee ka jira deegaannada uu xafiiskiisa Muqdisho maamulo, Waftiga maamuluhu waxa kale oo ay kulammo la qaateen madax-xafiiseedyada iyo halwadeennada kale ee Muqdisho, kuwaas oo ay ka dhegeysteen warbixinno la xidhiidha hawlahooda shaqo. Iyaga oo dhinacoodana siiyey xogta, Tilmaamaha iyo talooyinka muhiimka u ah hawlaha shaqo ee socda. Kulana dardaarmay muhiimadda ay leedahay in si hufan oo daahfuran loo guto waajibaadka shaqo.



MASHAARIICDA DHISMAHA



HAWSHA DHAMMAYSTIRKA XARUNTA AMAL EE BOORAMA OO MEEL FIICAN Maraysa



Waxaa weli si firfircoon u socota hawsha dhammaystirka dhismaha, xarunta caafimaadka ee AMAL oo ka socda Boorama. Waa Mashruuc ay dedejintiisu muhiim tahay, marka la eego baahida daran ee bulshadu ay u qabto adeegyo caafimaad oo casri ah.

Magaalada Boorama ee xarunta gobalka Awdal, waxa ay ka mid tahay deegaannada ay ARC muddada dheer ka wadday, adeegyada caafimaad iyo mashaariic kale oo waxbarasho iyo guud ahaan arrimaha

samafalka la xidhiidha.

Mashruucan waxaa caawinaysa hay'adda caalamiga ah ee ALRAXMA Kuweyt, waxa aanu qayb ka yahay barnaamijka samafalka caafimaadka ee ARC oo ka socda deegaanno kala duwan oo Geeska Afrika ah.

ARC waxa ay hore xarumo caafimaad iyo cisbitaallo uga dhistay, kana shaqaysiisaa deegaanno kala duwan oo ka mid ah dhulka Soomaalida ee gobalka Geeska Afrika.



MASHAARIICDA BIYAHA IYO FAYADHOWRKA



ARC OO HIRGELISAY CEELBIYOOD KU FILAN 500 QOYS

Baydhabo, Soomaaliya – ARC waxa ay xadhiga ka jartay ceelbiyood jooggiisu dhan yahay 70 mitir oo ay ka hirgelisay deegaanka magaalada Baydhabo ee Soomaaliya. Ceelkan oo loo dhammaystiray kaabayaasha ay ka mid yihiin qalabka biyaha ka soo tuuraya oo koronta ku shaqaynaya, qaybta korontada qorraxda ka dhalinaysa (Soolar), qasabadaha ay dadku ka dhaansanayaan iyo o darka ay xooluhu ka cabbayaan.

Ceelkani oo filan baahida biyood ee in ka badan 500 oo qoys, waxaa maalgelintiisa naga caawisay hay'adda caalamiga ah ee ALRAXMA Kuweyt.

Waxa aanu qayb ka yahay Barnaamijka biyaha ee ARC oo ujeedaddiisu tahay in dadka saboolka ah ee Deggen dhulka oomanaha ah laga caawiyo, helitaanka biyaha. Gaar ahaan xilliyada abaaraha.



AQOON & OGAAL



Mac-hadka Taabarrada ee ARC oo macallimiinta siiyey Tababar kobicinta xirfadda Hab-qoraalka

Mac-hadka Tababarrada iyo diyaarinta ee Kuweytiga ayaa soo gebagebeeyey tababar, muddo saddex bilood ah u waday macallimiin ka socda jaamacadda Al-bayaan ee magaalada Hargeysa iyo xarunta waxbarashada Kuweytiga.

Tababarkan oo ay bixinayeen barayaal ku xeeldher koorasooyinka ay bixinayeen, waxa uu ku aaddan macalinnimada iyo xirfadda hab-qoraalka wanaagsan ee afafka Ingiriisiga iyo Carabiga, waxaana ka faa'iidaystay lixdan macallin oo 10 ka mid ahi ka socdeen jaamacadda Albayaan, kuwaas oo isugu jiray 26 ah barayaasha af Carabiga iyo 34 Ingiriisiga dhiga.

Markii ay koorsadani dhammaatay, waxaa tababartayaasha lagu sameeyey sahamin iyo qiimayn lagu eegayey heerka ka faa'iidaystiga tababarka iyo miisaanka casharrada ay ka korodhsadeen.

Dr. Mudahar Xuseen, ku xigeenka maamulaha guud ee ARC oo ka qaybgalay munaasabadda lagu soo xidhayey tababarkan, ayaa hadal uu madasha ka jeediyey waxa uu bogaadiyey tababarkan iyo hannaankii quruxda badnaa ee uu u soo dhammaystirmay. Waxa aanu rajeeyey in uu noqdo mid waxtar iyo faa'iido ku kordhiyey xirfaddii waxbariseed ee tababartayaasha. Isaga oo kula dardaarmay dhaqangelinta waxa ay barten, iyo in ay aqoontaas la sii wadaagaan barayaasha kale ee ay shaqo wadaagta yihiin. Si uu nidaamka waxbarasho ee goobaha ay ka yimaaddeen iyo guud ahaan dalkuba u noqdaan midho dhal, una rumeeyaan yoolashooda.

Mudane Muxamed Cabdalwahaab, madaxa Barnaamijka waxbarashada ee hay'adda



gargaarka Afrika (ARC), ayaa isaguna tababartayaasha ku baraarujiyey muhiimadda weyn ee ay leeyihiin tababarrada kobicinta xirfadda macalinnimada, iyo sida ay u kobciso waayo-aragnimadooda.

Halka uu mudane Axmed Cabdaxamiid, masuulka xarunta Kuweytiga ee magaalada Hargeysa, uu isaguna sheegay in tababarrada noocan ahi xoojiyaan kartida macallinka, iyo awoodda ay u leeyihiin Maaraynta caqabadaha ka hor yimaadda fasalka dhexdiisa.

Ugu dambayn waxaa munaasabadda hadal kooban ka jeediyey mudane Xasan Muuse, maamulaha dugsiga sare ee Kuweytiga, qaybta wiilasha. Waxaana hadalladiisa ka mid ahaa, "Waxaa hubaal ah in tababarkani uu yeelan doono raad togan oo fasallada laga dhex arko, waxa uu macallimiintan ka caawin doonaa dadaalkooda ay kor ugu qaadayaan heerka waxbarasho ee ardaydooda" isaga oo dhinaca kalana hoosta ka xariiqay in tababarkani uu macallinka u leeyahay faa'iidooyin dhinacyo badan leh oo ay ka mid tahay, in uu korinayo awooddooda dhinaca afafka.

Gunaanadkii munaasabaddan waxaa tababartayaasha la guddoonsiiyey shahaadooyinka ka marag kacaya tababarkan



ARC Oo Tababarro Kala Duwan Siisay Halwadeenanda Xafiiska Muqdisho



Hay'adda Gargaarka Afrika (ARC) ayaa halwadeennadeeda kala duwan ee xafiiska Muqdisho iyo Gobollada Koonfurta ka ah waxa ay siisay tababarro kor loogu qaadayo tayo-wanaagga maamulka, laguna kobcinayo xirfadda shaqaalaha.

Barnaamijkan oo qayb ka ah dadaallada ay ARC doonayso in ay kor ugu qaaddo kartida iyo aqoontooda, waxaa ka mid ahaa tababarro iyo aqoon-korodsiyo, sida diyaarinta miisaaniyadda shaqada, iyo hannaanka ugu hufan ee si daahfuran loogu adeegsan

karo, iyo dejinta qorshe hawleedyada iyo diyaarinta warbixinaha shaqo. Sida oo kale Mudane Muxamed Cabdawlahaab, madaxa Barnaamijyada waxbarashada ee ARC ayaa shaqaalaha mashaariicda waxbarashada ee xafiiska Muqdisho siiyey tababar la xidhiidha kobcinta tayada iyo qiyamka fiican ee waxbarashada. Dhinaca kalana waxaa hawladeenanda xafiiska Muqdisho lagu tababaray halbeegyada tayo-wanaagga maamulka iyo qiyamka shaqo ee caalamiga ah.



MASHAARIICDA ARRIMAHA BULSHADA



ARC Oo Qoysas Danyar Ah U Abuurtay Ganacsiyo Yaryar



ARC ayaa qoysas danyar ah oo ku nool Boorama iyo Laascaanood u furtay gacansiyo yaryar. Saddex qoys oo laba ka mid ahi ku dhaqan yihiin Laascaanood, midka kalana Boorama ayaa la siiyey buudhiyo kaariyoone ah oo u diyaarsan dukaan ahaan, iyo badeecadihii raasamaalka u noqonayey meheradda cusub ee lagu iibinayey.

Mashruucan ayaa qayb ka ah Barnaamijka 'Xoogsi Xalaal ah' oo ARC ay qoysaska danyarta ah ugu samayso meherado ganacsi ama xirfado iyo farsamada gacanta oo ay ku xoogsadaan, si ay ugu noqoto il

dakhli oo ay noloshooda ka kaabaan.

Barnaamijka Xoogsi xalaal ah waxaa sannad kasta ka faa'idaysta boqolaal dhalinyaro ah oo kaalin waxsoosaar ugu jira qoysaskooda. Waxa aanay ujeedadiisu tahay in la yareeyo baahida kaalmada dibadeed, lana dhiirrigeliyo koboca dhaqaale ee bulshada.

Barnaamijka Xoogsi xalaal ah oo ay ARC ka fuliso guud ahaan dhulka Soomaalida ee gobalka Geeska Afrika, waxaa maalgelisa hay'adda caalamiga ah ee ALRAXMA Kuweyt.





Haween Loogu Deeqay Tababarka Dhar-tolidda Iyo Makiinado Dawaar



Machadka farsamada gacanta iyo xirfadaha ee Kuweytiga ayaa tababar xirfadda tolmaha dharka ah siiyey, toban ka mid ah haweenka magaalada Boorama ee gobalka Awdal. Barayaal ku xeeldheer nashqadda, jarjaridda iyo tolmaha dharka ayaa hablahan baray noocyada kala duwan ee xirfadda. Markay ay dhammaysteenna waxaa la guddoonsiiyey Makiinadaha tolmaha oo loogu talagalay in ay ku shaqatagaan.

Machadyada farsamada gacanta iyo xirfaduhu waxa ay ka mid yihiin, mashaariicda ay hay'adda Gargaarka Afrika (ARC) ka fuliso Somaliland, waxa aanay

xarumo si fiican u qalabaysan, barayaal takhasus ahina joogaan ku leedahay magaalooyinka Hargeysa, Boorama iyo Burco Somaliland. Kuwaas oo ay sannad kasta ka faa'iidaystaan boqolaal ka mid ah dhalinyaradu.

Ujeedada barnaamijkan ayaa ah in dhalinyarada la baro xirfado looga baahan yahay suuqa shaqada, si ay fursad ugu helaan in ay abuuraan ilo dakhli oo ay noloshooda ka maareeyaan. Isla markaana loo yareeyo baahida ay dadku u qabaan ku tiirsanaanta kaalmada dibadda. Barnaamijkan waxaa maalgelisay hay'adda caalamiga ah ee ALRAXMA, Kuweyt.

ARC ayaa Qoys danyar ah xoolayn u samaysay



Hay'adda Gargaarka Afrika (ARC) ayaa laba neef lo' ah oo irmaan, mid kastaana lammaan yahay ugu deeqday qoysas danyar ah oo ku dhaqan duleedka magaalooyinka Jigjiga, dawlad-deegaanka Soomaalida iyo Muqdisho Soomaaliya. Xoolahan dhaqashada ah ayaa loogu talagalay in qoysaskan oo danyar xooluhu ka baxeen ahi ay ka faa'iidaystaan caanaha, subagga, iyo taranta.



Mashruuca xoolaynta qoysaska danyarta ah, waxa uu qayb ka yahay barnaamijka Xoogsi xalaal ah oo sannad kasta ay ka faa'iidaystaan boqolaal qoys oo danyar ahi. Waxa aanay ujeedadiisu tahay in qoysaska loo sameeyo il dakhli iyo dhaqaale abuur, si loo yareeyo ku tiirsanaanta kaalmada dibadda, loona dhiirrigeliyo xoogsiga iyo waxsoosaarka bulshada.



@africanreliefco



Address: Barbera Road - Hargisa

Mobile: +252633278256

Phone: +252514333

E-Mail: somalia office1@gmail.com

Website: www.arcsom.org

